

lis Gnovis

■ **FELET.** In sene "Mishima-Pasolini: Dialogo a morte"

La stagjon teatrâl n.5 "Savôrs" dal Teatri Stabîl Furlan, par cure dal diretôr artistic Massimo Somaglino, si siere miercus ai 24 di Jugn aes 8.30 sore sere li dal Teatri Paolo Maurenig di Felet cul drame sonôr "Mishima-Pasolini: Dialogo a morte", ideât e svilupât di Marco Maria Tosolini. I doi grancj poetis e cineascj Yukio Mishima, gjaponês (1925-1970), e Pier Paolo Pasolini (1922-1975), a metin in lûs, incuintrants, svariâts aspiets de proprie vite e personalitât scuvierzint ponts in comun e altris pluitost lontans. Ndi nas cussì un colucui strani, strutturât lant daûr de ars retorica dal secul XVII (e di derivazion latine), li che i passaçs a son segnâts dai amoniments dal oracul (la Pizie) e di un "jevâ sù" vivarôs dal mont dai suns cun tocs di violin classic, che i da cuintri dome a moments la musiche cerimonîal gjaponese Gagaku. Jentrade sore nuie.

■ **CURNIN.** Variûi invelenâts



In Austrie a son stâts cjatâts sîs variûi muarts e un che si è rivâts a salvâlu, a cause dal contat cuntun prodot proibît dal 2008, il carbofuran, un pesticide une vore potent, che al pues puartâ ae muart intun marilamp. Cussì a àn stabilît i esams che a son stâts fats te facultât di Medisine Veterinarie di Viene. Tra i ucies muarts, al à dit il diretôr de riserve di Curnin, al jere ancje Acale, un variûl nassût tes volieris de riserve tal 2014, e liberât tal Setembar di chel an, che al jere stât fotografât intant che al svolave parsore dai Pireneus, e un altri, che al è stât salvât e curât, e po lassât libar. Lis indagjinis a son fats de bande de Austrie, e si pense che il pesticide al sedi stât metût in lescjis destinadis ai predadôrs.

■ **SPILIMBERC.** A fasevin spagnolets cence paî il dazi

Cundut che no si pues fumâ plui scuasit di nissune bande – i plui pessimiscj a àn pôre che tra di un pôc no si podarà fâlu plui nancje tal Infer – a son in tancj chei che no rivin a fâ di mancûl di chel fumut perlin che si jeve sù des boris dal spagnolet e di chel arome che invezit altris al intossee. Il Stât, vuelistu par fâ in mût che si consumin di mancûl i spagnolets, vuelistu par tirâ dongje cualchi francut cuant che al covente, che tant si sa che par cui che al dopre cheste medisine al è difil fândi di mancûl, ancje se al scuen spindi alc di plui, ogni tant al alce il dazi sui spagnolets. E alore, ve che a cualchidun i è vignude la idee di rangjâsi, metintsi in propri a fâ spagnolets cence che il Monopoli lu vegni a savê. Il Monopoli magari no, ma la Finance sì, che tai dîs passâts e à scuvierzût, te zone industriâl di Spilimberc, un capanon dulà che si fasevin spagnolets di scuindon. A àn cjatât i machinaris, a àn secuestrât 25 milions di pachets za prontos, passe 70 toneladis di tabac pront par jessi trasformât in spagnolets, che la fabriche e rivave adore di fândi 5 milions par di. Clâr che i responsabii pescjâts sul fat, no àn podût sostignî che si tratave di une modiche cuantitât par ûs personâl, e clâr ancje che a vareassin sperât che duç chei milions di spagnolets secuestrâts a fossin lâts in fum in ben altre maniere...



Miercus 17	S. Rainîr	Domenie 21	XII Domenie vie pal an
Joibe 18	S.te Marine	Lunis 22	S. Nicêt di Aquilee
Vinars 19	S.ts Gjervâs e Protàs	Martars 23	S. Bili
Sabide 20	S. Etor	Il timp	Prevalence di cjalt.



Il soreli
Ai 17 al jeve aes 5.15 e al va a mont aes 21.01.



La lune
Ai 21 Prin cuart.

Il proverbi
Bisugne rompi i ûfs se si vûl fâ la fertaie.
Lis voris dal mès
Tal vuestri ort no àn di mancjâ lis carotis. Une ortaie siore di vitamine A e di beta-carotene, che e jude a rinfurcâ la viste.

Gnognosaurs. In edicule il gnûf album di colorâ



Te gnove aventure, dute di colorâ, il professôr Einsaur e il so fedêl assistent Blik a provin di volâ, ispirâts dai pterodattils. Rivarano?

Al è rivât tes ediculis dal Friûl il secont album di colorâ dai Gnognosaurs, i simpatics dinosauruts dordei che a fevelin par furlan e che a àn concuistât grancj e piçui dilunc des festivitâts di Nadâl cul lôr debut editoriâl. Il gnûf album, intitolât "Tal blu piturât di blu", al è publicât di La Vita Cattolica, il setemanâl de Diocesi di Udin, e al è stât pensât par compagnâ i fruts par dut l'istât, tra colôrs, zûcs e storiis. Come che tal prin episodi, lis taulis di colorâ no son dome dissegns a sè: dutis adun a componin une storie complete, trasformant l'album intun fumet di colorâ di

Daspò dal sucès dal prin album vignût fûr a Nadâl, i simpatics dinosauruts che a fevelin furlan a proponin pal Istât une gnove aventure dute di colorâ

bessôi, pagine dopo pagine. Une formule che e veve za concuistât i letôrs dal prin numar. Se tal prin volum la storie e faseve in mût di presentâ i varis personaçs dal mont dai Gnognosaurs, i protagoniscj di cheste seconde aventure a son il professôr Einsaur, strampalât sienziât dal Jurassic, e il so fidât assistent Blik. Cjalant il svol dai pterodattii, i doi a decidin di imitâju e si butin intune imprese dute di ridi e di colorâ. I pterodattii a diventin ancje l'argument de pagine Educational, presinte in ogni album. Cheste volte i fruts a podaran scuvierzi il Preondactylus buffarinii, il rettil

svolant che al viveve tal Triassic superiôr, cirche 228 milions di agns indaûr, e che al è stât cjatât tal comun di Preon, in Friûl. Considerât il pterosauri plui primitîf e un dai plui antics mai scuvierzûts, il Preondattil al è un mût par fâ sintî i piçui letôrs braurôs dal teritori dulà che a vivin. L'album al è completât di zûcs, quiz e ativitâts pensadis par un Istât di divertiment, sot dal segn de creativitât e de lenghe furlane. "Tal blu piturât di blu" al è disponibil tes ediculis dal Friûl e si pues comprâlu ancje online (sul sit de La Vita Cattolica: www.lavitacattolica.it).

Peraulis in dismentie

par cure di **Mario Martinis**

> GRIVI

gg. = gravoso, pesante, appesantito (dal altino *grevis*, che sta per *gravis* 'pesante')
Tu mi âs metût intun lavôr une vore grivi.
Mi hai messo in un lavoro assai gravoso.

> GRUBIAN

agg. = rozzo, grossolano (dal tedesco *grob* 'villanzone', da *grob* 'grosso')
Sandri al è masse grubian cu lis feminis.
Sandro è troppo rozzo con le donne.

> GRUMÂL

s.f. = grembiule (dal latino *gremium*)
Ce biel grumâl che ti à regalât Mariut.
Che bel grembiule ti ha regalato Mario.

> GRUMBULE

s.f. = bernoccolo, gonfiore circoscritto alla testa; rialzo tondeggiante del terreno (forma diminutiva di *grum*, dal latino *grūmus* 'mucchio, rialzo di terra', a sua volta forse da un relitto mediterraneo, come il greco *krómax*)
Stele, cemût âstu cjàpât cheste grumbule?
Stella, in che modo hai preso questo bernoccolo?

> GRUSE

s.f. = crosta (dal latino *crust(am)* 'crosta')
Il frutin al à sul cjâf cualchi grusute.
Il bambino ha sul capo qualche crosticina.

> GUE

s.m. = arrotino, figura famosa in città come in campagna (in friulano si chiamava anche *uzzefuârfis*) (dal latino parlato **acutare* 'affilare', dal latino *acutiare*, derivato di *acuere*)
Il gue al passe il prin vinars dal mès.
L'arrotino passa il primo venerdì del mese.